

每週經課朗誦經文(巴克禮漢羅/教羅)2014/09/07

共同經課 - 1 出埃及記十二章一節~十四節

1 耶和華 tī 埃及地對摩西、亞倫講；2 Chit 月 tiòh 做 lín ê 正月，做年年 ê 頭一月。3 Lín tiòh 對以色列 ê 全會講：本月初十日，tāk 人 tiòh 照老父 ê 家，取羊 á，一家一隻。4 若是一家 ê 人 siuⁿ 少，一隻羊 á 食 boē 了，伊 tiòh kap 隔壁 ê 厝邊，照人額，相 kap 取一隻；lín 備辦羊 á，tiòh 按算 tāk 人所能食 ê 量。5 Lín ê 羊 á tiòh 無瑕疵 ê，未滿年 ê 羊 káng-á；lín tiòh tùi 綿羊中，á 是山羊中，取伊，lóng thang；6 lín tiòh 留到本月十四日，黃昏 ê 時，以色列全會 ê 眾人 tiòh thài 羊 á。7 In tiòh 取淡薄血，抹 tī 食羊 á hit 間厝，雙 pêng ê 門 khiā kap 門楣。8 Hit 暝 tiòh 食羊 á ê 肉，用火 pek 伊，kap 無酵餅、苦菜 chham-teh 食。9 M̄-thang 生(chhiⁿ) 生食，決斷 m̄-thang 用水煮，tiòh 用火 pek；頭、腳，kap 五臟 lóng tiòh 食。10 Lóng m̄-thang 留隔早起，若留到隔早起 tiòh 用火燒。11 Lín tiòh án-ni 食 i；腰 hâ 帶，腳穿鞋，手 khiā 拐 á，也 tiòh 趕緊食；這是耶和華 ê poāⁿ 過節。12 因為 hit 暝我 beh 遍行埃及地，phah 死埃及地一切頭上生 ê，無論人 kap cheng-siⁿ；koh beh 審判埃及一切 ê 上帝(=神明)；我就是耶和華。13 Chit-ê 血 tī lín 所 khiā 起 ê 厝，beh 做 lín ê 記號；我一下看見 chit-ê 血，就 tùi lín poāⁿ 過去；我 phah 埃及地 ê 時，災禍無到 tī lín，來滅 lín。14 Lín tiòh 用 chit 日做記念，守伊做耶和華 ê 節；lín tiòh 代代守 chit-ê 節，做永遠 ê 例。

共同經課 - 2 詩篇一百四十九篇 or 一百四十八篇

1 Lín tiòh o-ló 耶和華。Tiòh 唱新 ê 歌，o-ló 耶和華；Tī 聖 ê 百姓 ê 會中 o-ló 伊。2 願以色列因為造伊 ê 主來歡喜；願錫安 ê 百姓因為 in ê 王來快樂。3 願 in 跳舞 o-ló 伊 ê 名；Phah 鼓彈琴，唱歌 o-ló 伊。4 因為耶和華歡喜伊 ê 百姓；伊 beh 用救恩做謙卑 ê 人 ê 裝飾。5 願聖 ê 百姓因為所得 tiòh ê 榮光來歡喜；願 in tī 眠床裡出歡喜 ê 聲。6 願 in ê 嘴 o-ló 上帝做高，手 khiā 雙面內 ê 劍；7 Thang 報應外邦，刑罰列國；8 用鏈縛 in ê 君王，用鐵釦來鎖 in ê 人臣；9 Beh tī in ê 身上行所記載 ê 判斷；伊聖 ê 百姓 lóng 有 chit 號榮光。Lín tiòh o-ló 耶和華。

or

1 Lín tiòh o-ló 耶和華。Tùi 天頂 o-ló 耶和華；Tī 高 ê 所在 o-ló 伊。2 伊 ê 眾使者 ah，lín tiòh o-ló 伊。伊 ê 眾天軍 ah，lín tiòh o-ló 伊。3 日 kap 月 ah，lín tiòh o-ló 伊；發光 ê 星辰 ah，lín lóng tiòh o-ló 伊。4 天頂 ê 天，kap 天以上 ê 水 ah，lín lóng tiòh o-ló 伊。5 Chiah-ê lóng tiòh o-ló 耶和華 ê 名；因為伊一下命令，就 lóng 受創造。6 伊將 chiah-ê 建立，到永永遠遠；伊有定例，boē 會廢無。7 Tùi 地上 tiòh o-ló 耶和華，就是大魚 kap 一切 ê 深淵；8 火 kap 冰雹，雪 kap 雲霧；Thàn 伊 ê 話 ê 狂風；9 大山 kap 一切 ê 小山；結果子 ê 樹，kap 一切 ê 柏香樹；10 野獸 kap 一切 ê cheng-siⁿ；蟲 thoā kap 飛鳥；11 世上 ê 君王 kap 萬民；貴族 kap 世上一切 ê 審判官；12 少年人 kap 在室女；老人 kap gín-ná；13 Chiah-ê lóng tiòh o-ló 耶和華 ê 名；因為只有伊 ê 名受尊做高；伊 ê 榮光 poāⁿ 過天地。14 伊興起伊 ê 百姓 ê 角，Hō 伊聖 ê 百姓 lóng o-ló 伊，就是以色列人，親近主 hit-ê 百姓。Lín tiòh o-ló 耶和華。

共同經課 - 3 羅馬書十三章八節~十四節

8 莫得欠人甚麼，只有相疼 iáu 是欠人；因為疼人 ê 有盡律法。9 因為所講，M̄-thang 行淫，m̄-thang thài 人，m̄-thang 偷 thèh，m̄-thang 貪心，á 是別條誠，lóng 包含 tī chit 句，Tiòh 疼厝邊親像家己。10 仁愛無害 tiòh 厝邊；所以仁愛是盡律法。11 Án-ni-siⁿ 知 chit-ê 時候就是 lín 已經 tiòh 睏醒 ê 時；因為咱得 tiòh 救，比起頭信 ê 時 khah 近。12 暝 beh 過，日時近 lah；所以咱 tiòh thng 去烏暗 ê 所行，來穿光明 ê 戰甲。13 所行 tiòh 端正，親像 tī 日時；莫得放縱酒醉，莫得好色邪淫，莫得相爭怨妒。14 Tiòh 穿主耶穌基督，莫得為 tiòh 肉體圖謀，致到 thàn 私慾。

共同經課 - 4 馬太福音十八章十五節~二十節

15 設使你 ê 兄弟得罪你，就 tiòh 去，kan-ta 你 kap 伊 tī-teh ê 時，指明伊 ê m̄-tiòh；伊若聽你，就得 tiòh 你 ê 兄弟。16 伊若 m̄ 聽，就 tiòh chhoā 一兩人 saⁿ-kap 去，用兩三人 ê 嘴做干證，tāk 句話 thang 做憑準。17 若 m̄ 肯聽 in，就 kā 教會講；若 koh m̄ 肯聽教會，就 tiòh 看伊親像外邦人，kap 抽餉 ê 一樣。18 我實在 kā lín 講，凡若 lín tī 地裡縛 ê，tī 天裡也 beh 縛 in；凡若 lín tī 地裡 tháu ê，tī 天裡也 beh tháu in。19 我 koh kā lín 講，設使 lín 中間兩人 tī 地裡無論求甚麼，若是同心，就我 tī 天裡 ê 父 beh kā in 做成。20 因為不論甚麼所在有兩三人 tī 我 ê 名聚集，我也 tī in 中間。